

दिनांक 09.10.2023

समय: 18.50 बजे

आकाशवाणी जयपुर-अजमेर
प्रादेशिक समाचार

- राजस्थान समेत पांच राज्यां मांय विधानसभा चुनाव रा कार्यक्रम रो ऐलान-प्रदेश मांय 23 नवम्बर ने एक ही दौर मांय वोट पड़ेला।
- राज्य मांय विधानसभा चुनाव रा ऐलाण सागे ही चुनाव आदर्श आचार संहिता री पालना करावण रो काम सरू व्हयो-वोट देवण सारू हाल ई नाम जुडाया जा सके है।
- भारतीय जनता पार्टी विधानसभा चुनाव सारू 41 उम्मीदवारां री पहली लिस्ट जारी कीनी-लोकसभा रा 6 अर राज्यसभा रा एक सदस्य ने चुनाव मैदान मांय उतार्यो।
अर
- सघन मिशन इन्द्रधनुष टीकाकरण रो तीजो दौर आज सरू व्हयो।

निर्वाचन आयोग राजस्थान समेत पांच राज्यां मांय विधानसभा चुनाव री तारीखां रो ऐलाण कर दीनो है। राजस्थान मांय 23 नवम्बर ने एक दौर मांय वोट पड़ेला। ई बाबत् चुनाव अधिसूचना 30 अक्टूबर ने जारी करी जावेला। 6 नवम्बर ताई पर्चा दाखिल कर्या जा सकेला। नामपाना री छंटनी 7 नवम्बर ने व्हेला। उम्मीदवार 9 नवम्बर ताई नाम पाछा ले सकेला। ई रे अलावा मिज़ोरम मांय 7 नवम्बर ने, छत्तीसगढ़ मांय दो दौर मांय 7 अर 17 नवम्बर ने, मध्यप्रदेश मांय 17 नवम्बर ने अर तेलंगाना मांय 30 नवम्बर ने वोट पड़ेला। पांच ई राज्यां मांय वोटों री गिणती तीन दिसंबर ने करी जावेला। निर्वाचन आयोग रा मुख्य चुनाव आयुक्त राजीव कुमार आज नई दिल्ली मांय खबरनवीसां सागे बातचीत करता थकां आ जाणकारी दीनी। वे बतायो के आं पांच राज्यां री 679 विधानसभा सीटां माथे मतदान सारू आयोग मोटा पैमाना माथे तैयारियां कीनी है। चुनाव रा ऐलाण सागे ई आं राज्यां मांय चुनाव आदर्श आचार संहिता लागू व्हे ग्यी है।

000

खास सियासी पार्टियां पांच राज्यां मांय विधानसभा चुनाव रा ऐलाण रो स्वागत कीनो है। भारतीय जनता पार्टी रा अध्यक्ष जे.पी. नड्डा सोशल मीडिया पोस्ट रे ज़रिए कहयो के प्रधानमंत्री नरेन्द्र मोदी री अगुवाई मांय भारतीय जनता पार्टी आं सगळा राज्यां मांय भारी बहुमत सागे राज मासंय आवेला अर आवता 5 साल ताई जनता री उम्मीदां पूरी करण सारू काम करेला। कांग्रेस ई जनता रा भरोसा अर हिमायत रे पाण आं सगळा राज्यां मांय भारी बहुमत सागे जीत रो भरोसो जतायो। पार्टी री ओर ऊं जारी सोशल मीडिया पोस्ट रे मुजब आं राज्यां मांय वां री जीत किसानां, मजूरां, नौजवानां अर महिलावां रा हक री जीत व्हेला।

000

राज्य मांय विधानसभा चुनाव रो ऐलाण व्हेवण सागे ई चुनावी हलचल तेज़ व्हे ग्यी है। भारतीय जनता पार्टी आज वां रा उम्मीदवारां री पैली लिस्ट जारी कर दीनी। दूजी कानी कांग्रेस री ओर ऊं ई उम्मीदवारां रा नाम तैय करण बाबत् विचार चाल रह्यो है। पार्टी रा वर्किंग ग्रुप री मीटिंग आज नई दिल्ली मांय व्ही। ई मीटिंग मांय सिरकत करण सारू मुख्यमंत्री अशोक गहलोत अर कांग्रेस रा आला नेता दिल्ली मांय है।

000

राज्य मांय विधानसभा चुनाव रा ऐलाण सागे ही चुनाव आदर्श आचार संहिता री पालना करावण रो काम सरू व्हे ग्यो है। राज्य रा मुख्य चुनाव अधिकारी प्रवीण गुप्ता खबरनवीसां ने बतायो के चुनाव आदर्श आचार संहिता लागू व्ह्यां पाछे राज्य री योजनावां मांय अब कोई नुवो नाम नी जोड्यो जा सके है। गर किण ई नियुक्ति दीरीजी है तो वो बिना मंजूरी नौकरी या बताई ज्यो काम नी कर सकेला। गुप्ता बतायो के नुवा टेंडर अर दूजी प्रक्रिया चुनाव रो काम पूरो व्हेवण ताई अब नी व्हे सकेला।

000

मुख्य निर्वाचन अधिकारी प्रवीण गुप्ता आज जयपुर मांय खबरनवीसां ने बताया के सगळी सरकारी वेबसाइटों अर सरकारी इमारतां ऊं नेतावां रा फोटो अर विज्ञापन हटावण रा हुकम दिया ज्या है। मुख्य निर्वाचन अधिकारी बताया के 27 अक्टूबर ताई मतदाता सूचियां मांय नाम जुड़ाया जा सके है। वे बताया के दिव्यांग अर बुजुर्ग मतदाता घर ऊं वोट देवण रा सुबीता सारू 4 नवंबर ताई अर्जी दे सके है।

000

प्रदेश मांय विधानसभा चुनाव रा ऐलाण सागे ही चुनाव आदर्श आचार संहिता लागू व्हे गयी है। ई सागे ई सियासी पार्टियां कानी ऊं लगायी ज्या अर सरकारी योजनावां रा बारा मांय लगायी ज्या पोस्टर, बैनर अर होर्डिंग हटावण रो काम सरू व्हे गयो है। न्यारा-न्यारा जिलां मांय जिला निर्वाचन अहलकार ई बारा मांय हुकम दे र हर भांत री प्रचार सामग्री हटावण बाबत् कहयो है। गंगापुर सिटी री जिला निर्वाच अधिकारी डॉ. अंजलि राजोरिया विधानसभा चुनाव री तारीख रा ऐलाण पाछे अहलकारा सागे मीटिंग कर र चुनाव आदर्श आचार संहिता री पालना करावण सारू जरूरी हुकम दीना। करौली रा जिला निर्वाचन अधिकारी अंकित कुमार सिंह ई विधानसभा चुनाव री तैयारियां रा बारा मांय खबरनवीसां ने विगतवार जाणकारी दीनी।

000

भारतीय जनता पार्टी विधानसभा चुनाव सारू 41 उम्मीदवारां री पहली लिस्ट जारी कर दीनी है। म्हाणा खबरनवीस बताया के ई लिस्ट मांय केई मोटा नाम शामिल है।

000

भारतीय जनता पार्टी री ओर ऊं जारी उम्मीदवारां री पैली लिस्ट मांय सीकर जिला री लक्ष्मणगढ सीट ऊं पैली वाळा सांसद सुभाष महरिया ने भाजपा रा उम्मीदवार बणायी ज्या है। महरिया हाल ही मांय भाजपा मांय पाछा आया है। ई सीट ऊं कांग्रेस रा प्रदेश अध्यक्ष गोविंद सिंह डोटासरा मौजूदा विधायक है। उदयपुरवाटी ऊं भाजपा शुभकरण चौधरी ने उम्मीदवार बणायो है। पार्टी बहादुर सिंह कोली ने वैर ऊं, राजकुमारी जाटव ने हिण्डौन ऊं, नाना लाल आहरी ने खैरवाड़ा ऊं, सुशील कटारा ने चौरासी ऊं, भीमाभाई डामोर ने कुशलगढ ऊं टिकट दीनो है। भाजपा गुजर चुक्या गुर्जर नेता किरोडी सिंह बैसला रा बेटा विजय बैसला ने देवली-उनियारा ऊं मैदान मांय उतारयो है। रिटायर्ड आईएएस चंद्रमोहन मीणा ने बस्सी ऊं टिकट दियो ज्यो है। ई लिस्ट मांय चार महिला उम्मीदवारां रा नाम शामिल है।

000

राष्ट्रपति द्रौपदी मुर्मू मानवता री खुशहाली अर जलवायु मांय बदलाव रे कारण पैदा व्ही चुनौतियां रो सामो करण सारू उपयुक्त खाद्य प्रणाली बणावण माथे जोर दीनो है। राष्ट्रपति आज नई दिल्ली मांय न्यायोचित और उपयुक्त कृषि खाद्य प्रणाली की ओर शोध और उसके प्रभाव मुद्दा माथे राखी ज्या कार्यक्रम रा उद्घाटन जळसा मांय बोल रही ही।

000

सघन मिशन इन्द्रधनुष टीकाकरण अभियान रो तीजो दौर आज सरू व्हयो। 14 अक्टूबर ताई चालण वाळा ई अभियान रे दौरान 5 साल ताई उम्र रा बच्चां ने बीसीजी, डीपीटी, पेन्टावैलेन्ट, हेपेटाइटिस अर दूजा टीका लगाया जा रह्या है, ज्यां ऊं बच्चां ने 11 भांत री जानलेवा बीमारियां ऊं बचाया जा सकेला। ई अभियान रा तैत आस वाळी लुगाइयां रे टिटनेस रा टीका लगाया जावे है। झालावाड मांय ई अभियान सारू साढे 9 सौ ठौड़ां टीका लगाया जा रह्या है। बूंदी मांय मिशन इन्द्रधनुष टीकाकरण अभियान रा बारा मांय जाग जगावण सारू न्यारा-न्यारा कार्यक्रम राख्या जा रह्या है।

000

करौली मांय विश्व मानसिक स्वास्थ्य सप्ताह रा तैत न्यारी-न्यारी होड़ां राखी ज्यी। आं मांय शिरकत करण वाळा विद्यार्थी आज बेहतर मानसिक स्वास्थ्य रा बारा मांय जाणकारी हासिल कीनी। ई मौके मानसिक स्वास्थ्य एक सार्वभौमिक मानव अधिकार है मुद्दा माथे पोस्टर बणावण री होड़ ई राखी ज्यी।

000

आज विश्व डाक दिवस मणायी ज्यो। ई मौके कोटा मांय डाक सप्ताह राख्यो जा रह्यो है। ई रा तहत डाक विभाग री ओर ऊं न्यारा-न्यारा कार्यक्रम राख्या जा रह्या है। 13 अक्टूबर ताई चालण वाळा कार्यक्रमों रे दौरान विश्व डाक दिवस रा पोस्टर अर डाक सप्ताह रा बैनर रो दरसाव

कर्यो जावेला। डाक विभाग री ओर ऊं काल बचत बैंक योजनावां, डाक जीवन बीमा अर ग्रामीण डाक जीवन बीमा सारू डाक चौपाल लगायी जावेला। फिलेटली दिवस रा सिलसिला मांय 11 अक्टूबर ने जागरूकता सेमिनार राख्यी जावेला।

000

आई सी सी विश्व कप क्रिकेट होड रा तैत आज हैदराबाद मांय न्यूजीलैंड अर नीदरलैंड्स बीचे मुकाबलो खेल्यो जा रह्यो है। नीदरलैंड्स टॉस जीत र न्यूजीलैंड ने पैली बल्लेबाजी करण सारू बुलायो। न्यूजीलैंड री टीम तैय पचास ऑवर रा खेल मांय 322 रन बणाया अर वां रा 7 खिलाड़ी आउट व्ह्या। सब ऊं बत्ता 70 रन विल यंग बणाया जद के कप्तान लाथम 53 अर रचिन रविन्द्र 51 रन बणाया। जवाब मांय आखिरी समाचार मिलण ताई नीदरलैंड्स री टीम 10 ओवर रा खेल मांय 39 रन बणा लीना हा अर वां रो एक खिलाड़ी आउट व्हे गया हा।